

REDAKSIONEEL

HEENGAAN DS. J. OVERDUIN

Prof. J. H. van Wyk vra tereg dat die heengaan van ds. J. Overduin in 1983 nie ongemerkt by ons moet verbygaan nie en hy skryf soos volg: Ds. Overduin was as besoeker en skrywer goed bekend in Suid-Afrika. Daarby was hy 'n vrugbare skrywer wat etlike waardevolle boeke die lig laat sien het. Ek herinner my nog goed watter besondere indruk sy boek oor die Christelike hoop, getitel *Het Onaantasbare*, op my as jongman gemaak het, en dit nog lank voordat die Duitse teoloog Jürgen Moltmann sy boek oor *Teologie van die hoop* geskryf het. Overduin se dagboek *Venster op het Leven*, wat ook in Afrikaans vertaal is, beskou ek as een van die heel beste van sy soort wat ek onder oë gehad het. Sy boek oor "evangelisasie", *Tact en Contact*, in Afrikaans bekend as *Die Evangelie vandag!*, is nog altyd die moeite werd om te raadpleeg. Hy skryf trouens hierin as iemand wat self diep in die praktyk van evangelisasie gestaan het. Sy *Profetische vergezichten* bevat 'n skat van kosbare preekgedagtes.

Ds. Overduin het 'n veelbewoë lewe gehad. Gedurende die Tweede Wêreldoorlog is hy vanweë sy verset teen die nazisme deur die Duitsers gevange geneem en in die konsentrasiekamp te Dachau gestop. Van die 65 wat saam met hom gevang was, het net drie oorleef. Sy onmenslike wedervaringe in hierdie kamp het neerslag gevind in sy aangrypende boek *Hel en hemel van Dachau*. Hy het ook die tragiese kerkskeuring van 1944 in Nederland meegemaak maar nie met die vrymaking saamgegaan nie.

Ds. Overduin was 'n taalkunstenaar met 'n ope oog vir die wysheid en omvattendheid van die evangeliese boodskap. In tye van gerusstellende prediking — "God is outomaties aan ons kant!" — kon hy klem lê op die (ook sosiale) verantwoordelikheid van die mens, sodat selfs na hom verwys is as die "rooi dominee". In tye van horisontalisme, wat hy later in sy lewe meegemaak het, kon hy weer klem lê op die vertikale aspek van die evangelie en die verhouding tot God beklemtoon.

Die stem van hierdie begaafde prediker en skrywer is stil. Ons sal sy stem mis. Dit is selde dat so 'n kombinasie van goeie teologie en goeie verwoording en vergestaltung daarvan in een persoon gevind word. Die bestudering van sy geskrifte is steeds 'n vrugbare en verrykende ervaring.